

centum stadiorum : in ea mons adeo altus est, ut nubes ipsas transcendat. Est & vertex altissimus prope Yai civitatem nomine Hoeifung, hunc tantæ altitudinis esse volunt, ut quod de Olympo prædicant, nec ventus, nec pluvia illius superiora infestet; ex mari tempestates reprimere, atque infringere videtur, unde illi nomen Hoeifung inditum, hoc est, remittens ventum.

Flumina.

De mari, quod Kiün civitatem alluit, illud notatu dignum scribunt Sinæ Geographi, quod maris æstus, quod tamen in aliis vicinis locis commune est, non sentiat; sed per dimidiam mensis partem versus or-

tum, per alteram dimidiam versus occasum fluat.

Tung lacus ad urbis orientalem partem est, ex ruina ingentis oppidi, & terræ hiatu productus. reliqua se habent, uti in mappis.

Munimenta.

DEcem omnino numerat munimenta ad Provinciæ & maris custodiam, quorum hæc sunt nomina, 1 Taching, 2 Tungo, 3 Hanxan, 4 Cinghai, 5 Kiaçu, 6 Kiexe, 7 Ciexing, 8 Hiung, 9 Jungching, 10 Ciunling.

